

Codex Laureshamensis Teil: Bd. 1, Einleitung, Regesten, Chronik Nr. 38 (Reg. 3492)

In nomine sancte et individue trinitatis. Hludouuicus divia favente gratia rex. Notum sit omnibus sanctae dei aecclesiae fidelibus nostrisque, presentibus scilicet et futuris, qualiter nos ob nostrae mercedis augmentum, et pro remedio animae domni aui, et genitoris nostri, concessimus quasdam res proprietatis nostrae ad monasterium Lauresham, quod est constructum in honore beatorum apostolorum Petri et Pauli, ubi etiam requiescit corpore sanctus Nazarius, hoc est in pago renense ad Seheim et Bicchumbach, cum omnibus ibidem adiacentiis vel pertinentibus, in mancipiis, terris, vineis, pratis, pascuis, silvis, aquis, aquarumve decursibus, exitibus et regressibus, mobilibus et immobilibus, quaesitum et ad inquirendum, totum et ad integrum ex iure et dominatione nostra in ius et dominationem prefati sancti loci tradimus atque transfundimus, ea videlicet ratione, ut ab hodierna die et deinceps per hoc nostrae auctoritatis preceptum, plenius in dei nomine confirmatum, in usus fratrum domino ibidem famulantium perpetualiter permaneant, absque alicuius contradicentis obstaculo. Quod si nunc nos easdem res cum consensu et voluntate dilecti filii nostri Karoli statim commutare possumus, hoc omnino desideramus. Si autem hoc esse nequiverit, tunc firmiter precipimus atque iubemus, ut post obitum nostrum perpetualiter ibi permaneant, | absque alicuius molestia vel inquietudine. Et ut hec auctoritas largitionis nostrae firmior habeatur, et per futura tempora a fidelibus nostris uerius credatur, et diligentius obseruetur, manu propria nostra subter eam firmavimus, et anuli nostri impressione assignari iussimus. Signum Hludouuici M. serenissimi regis. Heberhardus cancellarius ad uicem Liutberti archicapellani recognovi et subscripsi. Data IIII^a non. maias, anno Christo propitio XXX^oVII^o regni domni Hludouuici serenissimi regis, in orientali Francia regnantis. Indictione VII^a. Actum Lobotenburc, in dei nomine feliciter. Amen. Christe protege Hludouuicum regem.